



ШЫН

НИИТИЛЕЛ-ПОЛИТИКТИГ СОЛУН

1925 чылдың
август 31-де үнүп
эгепээн

№ 105 (17053)

2005 чылдың
сентябрь 20,
ВТОРНИК

Номерни парлалгаже
дужааганы:
график езугаар – 21.00,
херек кырында – 19.00
Садар өртээ – 3 рубль.



Кызыгаар айтырыын чогумчудар дээш...

Тыва Республиканың Чазааның Даргазы Ш.Д.Ооржактың чалааны-биле Россия Федерациязының Федералдыг хуралының Күрүне Думазының болгаш Моолдун Күрүнениң Улуг Хуралының делегациязының киржилгези-биле сентябрь 16-17 хүнеринде Тывага россия-моол күрүне кызыгаарының тыва участогунда кызыгаар чурумунун чидиг айтырыгларын сайгарып чугаалашкан.

Россия Федерациязының Федералдыг хуралының Күрүне Думазының делегациязын Айыыл чок чорук талазы-биле комитеттин оралакчы даргазы, Моолдун парламенти-биле харылзаа тудар депутат бөлүүнүн координатору

Виктор Войтенко баштап чораан. Ол ышкаш Күрүне Думазындан Күш-культура, спорт болгаш аныяктар херектеринин талазы-биле комитеттин бирги оралакчызы Ильдар Гильмутдинов, Культура талазы-биле комитеттин оралакчы даргазы Чылгычы Ондар, Улустар аразының херектеринин талазы-биле комитеттин кежигүнү Камиля Давлетова болгаш өскелер-даа келген. Кожавыста чуртун делегациязын Моолдун Улуг Хуралының кежигүнү, Россия Федерациязының парламенти-биле харылзаа тудар бөлүктүн удуртукчузу Д. Идэвхтэн баштап чораан.

Сентябрь 16-да ТР-ниң Чазак Бажыңына улуг хурал болган. Аңаа Россияның болгаш Моолдун парламенти-биле харылзаа тудар бөлүктүн удуртукчузу Д. Идэвхтэн баштап чораан. Хуралга ТР-ниң Чазак Даргазы Ш.Д. Ооржак россияжи болгаш моол таладан келген ийи делегацияны Тыва чуртта келгени-биле байыр чедирип чүве чугаалааш, Тываның бөгүндө ниити байдалы-биле каксы таныштыргаш, россия-моол күрүне кызыгаарының тыва

участогунда кызыгаар чурумунун чидиг айтырыгларын сайгарып чугаалажырының талазы-биле кады ажылдажылгага чедишкиннерни күзээн. Россия Федерациязының Федералдыг хуралының Айыыл чок чорук талазы-биле комитеттин оралакчы даргазы, Моолдун парламенти-биле харылзаа тудар депутат бөлүүнүн координатору Виктор Петрович Войтенко бо айтырыгны бүгү тала-биле чогумчалыг шийтпирлээри-биле ийи тала мында чыгып келгенинге өөрүп турарын демдеглээш, Тывага 1998 чылга чедир удаа-дараа кээп ажылдап турганын чугаалаан. (Уланчызы 2-ги арында).

Тыва Республиканың Чазааның Даргазының чанында Кижиниң эргелеринин талазы-биле комиссияның составына өскерилгелер дугайында Тыва Республиканың Чазак Даргазының ЧАРЛЫ

1. Тыва Республиканың Чазааның Даргазының 2003 чылдың август 11-де «Тыва Республиканың Чазааның Даргазының чанында Кижиниң эргелеринин талазы-биле комиссия дугайында» Чарлы-биле бадылааны Тыва Республиканың Чазааның Даргазының чанында Кижиниң эргелеринин талазы-биле комиссияның составына дараазында өскерилгелерни кирир:

Тыва Республиканың Чазак Даргазы Ш.ООРЖАК.
Кызыл хоорай.
2005 чылдың сентябрь 16.
№211.

Комиссияның даргазына Комиссияның даргазының албан-хүлээлгезинден Ч.Д. Чоксумну хостааш, Тыва Республиканың Чазак Даргазының күрүне – хоойлу-дүрүм эргелелинин начальнигинин оралакчызы В.Н. Фитинни бадылаар.

2. Бо Чарлык аңаа ат салган хүнден эгелеп күштүг болуп кирер.

Бедик шаңнаалдар-биле!

Тыва Республиканың Чазааның Даргазының 2005 чылдың сентябрь 16-да үндүргөн №213 Чарлы-биле арга-арыг ажыл-агыйының адырынга кирирген үлүг-хуузу болгаш хөй чылдарда ак сеткилдиг ажылы дээш

«Тыва Республиканың алдарлыг ажылдакчызы» деп хүндүлүг атты Барыын-Хемчик кожуунун арга-арыг ажыл-агыйының директору Сергей Иванович МАНЧЫНГА тыпсыр.

«Тыва Республиканың Чазак Даргазының Хүндүлел бижии-биле

Кызылдың арга-арыг ажыл-агыйының Черби лесничествозунун леснигинин дузалакчызы Виктор Григорьевич НИКИТЕН-КОНУ;

Кызылдың оперативтиг авиасалбырының летчик-хайгааракчызы Вадим Сарыг-

Тыва Республиканың Чазак Даргазы Ш.ООРЖАК.
Кызыл хоорай.
2005 чылдың сентябрь 16.
№212

оолович КЫЗЫЛ-ООЛДУ;

Тожу арга-арыг ажыл-агыйының кол экономизы Наталья Борисовна ВЛАДИМИРОВАНЫ;

Кунгуртуг лесничествозунун леснигинин дузалакчызы Михаил Хурбеевич ЧЫПСЫННЫ шаңнаар.

А.А. Сатты Тыва Республиканың Чазак Даргазының Хүндүлел бижии-биле шаңнаар дугайында

Тыва Республиканың Чазааның Даргазының Чарлы

Күүсекчи эрге-чагырга органнарынга кирирген үлүг-хуузу болгаш хөй чылдарда ак сеткилдиг ажылы дээш Тыва Республиканың Чазак Даргазының Хүндүлел бижии-биле Тыва Республиканың Чазааның Ак-Довурак хоорайда девискээр эргелелинин удуртукчузу Андрей Алдын-оолович САТТЫ шаңнаар.

Ажыл чок чорук эвээжеп олурар

«Тывастат» девискээр органының ай санында үнер «Сибирь Федералдыг округта регионнарның социал-экономиктиг байдалы» деп бюллетенин бо чылдың 6 айларының дургузунда сан-медээлери-биле алырга, Сибирьниң 12 регионнарының ортузунда ажыл чок чоруктуң деңгелинде Тыва мурнуку одуругну ээлеп турар. Тывада чурттап турар 305 муң кижиниң 126 муңу идепкейлиг ажыл кылып шыдаар шиктиг кижилер. Республикада бир хостуг ажылче 37 кижикордап турар, өске регионнарда бир ажылчыну турушче 1-ден 16 чедир кижикордап турар.

Бо чылдың январь-июньда ажылга хаара тудар федералдыг албанның департаментизинге 12865 ажыл чок кижини бүрүткээн, ол-ла үе дургузунда оларның барык үштүң бирин, 3869 кижини ажылга тургускан. Ажыл чоктарның кол нуруузу, 80 хуузу, көдээниң чурттакчылары – 10242 кижикордап турар.

Албан езузунун статистиказының сан-медээзи-биле алырга, 2005 чылдың январьдан июньга чедир кожууннар ортузунда ажыл чок чорук талазы-биле эң чидиг ай-

тырыглыг кожуунга Тере-Хөл хамааржыр. Оон соонда Чөөн-Хемчик, Бии-Хем, Кызыл кожууннар.

Эрткен чылдың бо-ла үезинде ажыл чок 13739 кижини бүрүткээн, ук сан-чурагай бо чылдындан хөй. Бо чылгы байдал элээн эки. Ажыл чоктарның үш категориязынга: аныяктар, херээженнер болгаш көдээниң чурттакчыларына хамаарыштып алырга, эрткен чылга бодаарга, ажыл чоктарның саны кызырлып олурар. Чижээлээрге, эрткен чылын ажыл чок 7876 херээжен турган болза, бо чылын оларның саны барык бир муңга кызырылган – 6955. Аныяктар ортузунда база ыңдыг. Турганы 5418, бо чылын 5016 кижикордап турар. Чыл бурунгаар ажыл чоктарның бүрүткелинге көдээниң 11088 чурттакчызы турган болза, ам ук сан-чурагай 10242.

Бир эвес бо көргүзүг мындыг деңгелге кадагалаттынып артар чүве болза, бистиң амыдыралывыстың хүнден хүнче экижи олурарының бадыткалы болур.

«Тывастаттын» материалдары-биле белеткээн.

Спортчу өг-бүлелер

2005 чылды бистиң республикада спорт болгаш кадыкшылдың чылы кылдыр чарлаан болгаш аңаа хамаарышкан яңы-бүрү хемчеглер болуп эртип турар. Эрткен дыштаныр хүннерде Тываның 5 чылы аттыг стадионга республика чергелиг «Авам, ачам база мен – спортчу өг-бүле» деп мөөрей болуп эрткен.

Үш аңгы бөлүккө уругларның назы-харының аайы-биле чарлып, өг-бүле командалары күжүн шенешкен. Эстафетага чарыш, шаптаразыннарлыг орутку эртери, хол-биле согун октап кара адады (дартс) болгаш уран чүүл талазы-биле бир күүселде мөөрейниң негелдезинде кирип турар.

9-11 харлыг уругларлыг өг-бүлелерниң командаларының аразындан Кызыл хоорай-

Мөөрей, мөөрей...

дан Аяна, Сергей Кечил-оолдар оглу Шораан-биле тиелекчи болуп үнген. Бай-Тайга кожуундан Орлан, Айлана Хомушулар оглу Марат-биле ийги черни элээн. А үшкү черде – Кызылдан Наталья, Алексей Бокаловскийлер уруу Ирина-биле.

12-13 харлыг уругларлыг өг-бүлелерден тиелекчи – Кызылдан Марат-оол, Елена Шойдаалар оглу Ким-биле. 14-15 харлыг уругларлыг өг-бүлелерден тиелекчи – Кызыл кожуундан Олег, Марьяна Сундуйлар оглу Айдыс-биле.

Тиелекчилерге хүндүлүг бижиктерни болгаш өртектиг белектерни тывыскан. Демниг өг-бүлелерге тиелелге-биле изиг байыр!

Бистиң корр.

